

## **Pol Mon Timosii Kin Nga Endi Polpu Kindim**

<sup>1</sup> Na Pol, na Krai Jisas nge ek ei se andi wu. Gos eim ek dinga yi ni pendim. Jisas Krai nge kongun e, Gos eim noman konj ei, sinim mei wumb ngumbii nirim. Nipi kin, eim noman e, “Na ek se endii,” nim.

<sup>2</sup> Timosii nim na nge kingam mi, na pipe ei polup nim ngond. Sinim nge Erinjpin Gos ni, Krai Jisas Owundu nim kin kaimb sipi nim noman ka ngang kin nim noman emin ka peng mulnji.

<sup>3</sup> Na nge kumb ok kupnan no, wumb mulk wumb ei, Gos nge o, ei ekii silmin o, ei nge, kunum na nim kin piip kin, na Gos kin prei epin tinga kunum kunum erip kin, noman ka piip ngo.

<sup>4</sup> Nim ningi ka mani orum ei na piip kin, na nim kanip kin, ka piimbii ni piind.

<sup>5</sup> Nim pii gii nin ei, na keimi ni piind. Ei kend mon. Pii gii nin o, ei, nim apinim Lois elim o, ei nim en. Nga ninim manim Yunis yi ku elim. Pe na piind ei, na pii gii ei nge, nim kin palim ku.

<sup>6</sup> Ei na piip kin, nim nip ngond. Gos nge epi wii ngurum ei, nim noman pirek neng piinjii. Ok na nim peng e, angil tonu kindinj kunum ei, Gos eim nim noman ka ei, epi wii mi, nim ngurum. Pe ninim Gos noman ka epi wii ngurum ei, piikin kin enjii. Eran kin, nim noman ka sirim ei, am opu owundu ermba. Ei yi mi, wu endi eim dup

kalpi kin, pup tang kin, nimbił oł elim? Ei sikir nopu owundu elim ei mił, yi enjii ku.

<sup>7</sup> Nim piin; Gos sinim kin Gui Ka ngum ei, sinim kulermin. Ba Gos Gui Ka sinim noman dinga ngum. Ngang kin, sinim wumb noman ka ngopun kin, sin sinim tep ka er mułmun nge ngum.

<sup>8</sup> Ei piikin kin, owundu nge ek ei singambił piikin kin, ninerii! Nim na kin singambił piinerii ku! Na Gos nge wu moł. Nim Gos nge dinga ngang kin, nim oł embin tui tonu omba ei ko wukun kin, na kin wan, silip kongun ende erpił kin, Gos ek ka ni wumb ngumbuł.

<sup>9</sup> Gos eim sinim sipi orung seng kin, nam nge wumb mułngii nim. Pe sinim eim kin ouni ka endi eramın kin, Gos sinim sip orung sinerim mon. Eim nge noman ele, sinim noman ka ngopu kin, sinim wii to sim. Kumb ok, muł mei eneririm kunum ei, Kraıs Jiisas eim sinim kin noman ka ngurum.

<sup>10</sup> Ba akip kunum ele, Kraıs Jiisas sinim sip orung simba nge tor onum. Eim nge kongun ele, Gos nge noman ngurum. Ei tor wang kin sinim piinmin, Kraıs Jiisas eim wumb koltmun oł ei nge, to mani kindpi, si kindim. Si kindpi kin, Gos nge ek ka ni tor kindim. Ei yi mił, noman konj ei nga poru ninermba; ba kunum kunum konj pimba.

<sup>11</sup> Gos eim na kongun ngopu kin, ek ka ei ninjii ni mundum. Na mołup kin, ek nip, wumb ngop, ek se andip kin, wumb ek emb top, wumb ngop nip kin, ermbii ni mundum.

<sup>12</sup> Gos ek ka ei minj, na ngenj ele, oł embin tui tonu omba. Oł pułe ele peng kin, na oł embin tui ei, ngenj ele tonu onum. Ba ele nge, na ngenj

singambil piinermbii mon. Na wu ei kin, pii gii dinga peng moł ei, na pii poru nind. Eim na angil ełe kongun ngurum ei, kunum kunum ka pep ba. Pang kin, eim kunum owundu sirim kunum ei tonu omba.

<sup>13</sup> Na ek kun nip, nim andan top ngunj mił, nim wumb kankin kin, ek ka ni ngan piingii. Nim Kraias Jiisas kin pii gii dinga peng kin, ek ninim mił piikin kin, Jiisas eim noman ka ngokun kin, ek ei ambil gii ni mulnjii.

<sup>14</sup> Gos nim kin epi ka angil ełe pendim ei, piikin kin, tep ka er mulnjii. Pe Gos nge Gui Ka sinim kin tuk ełe mołum ei, nim noman dinga ngopu kin, kongun ei paki tang kin, kongun ei kun ka er mułngii.

<sup>15</sup> Nim piin kin, Eisiya konu owundu ełe, Jiisas kin pii gii nik enjing wumb ni, Piselas ni, Emosenis ni wu tał kin, wumb pei na si kindinmin.

<sup>16</sup> Na Gos Owundu kin prei ermbii ni, wu Onesiporas ni eim amb kangil ei, Gos paki tumba ni piind. Kunum pei, Onesiporas eim na kin noman ka pii ngołum. Na kan ngii pir kunum ei, eim na kin singambil pinerim mon.

<sup>17</sup> Eim Rom konu owundu ełe opu kin, eim na kur kan simbii nipi orum. Opu kin, na kan sirim.

<sup>18</sup> Na Gos Owundu kin prei eramb kin, Jiisas orung omba ni pendrim kunum owundu kunum ełe, Gos Owundu opu kin, wu Onesiporas kaimb sipi ngumba. Ngopu kin Onesiporas eim na Epeses konu ełe epi kanim kanim erpi kin, na paki tołum; ei ninim piilin.

## 2

### *Nim Kraias Jiisas Nge Opu Wu Ka Mulnjii*

<sup>1</sup> Pe nim na nge kingam mołun. Kraias Jiisas nim kin to dambiltpi se ende kind pendim ełe, eim nim kin noman ka ngopu kin, noman dinga ka wii ngumba ei, nim kunum kunum sinjii.

<sup>2</sup> Pe ek pei na nip kin, wumb pei kumb ełe ngunj ek ei, nim piin. Piikin kin, ek ei nikin, wu kombur ngan kin, dinga piik erngii. Wumb ei, ambıl gii nik mołmun wumb ombu kin, kapłi ek nik kin, wumb emb to ngungii ku.

<sup>3</sup> Nim Kraias Jiisas nge opu ond wu ka wii dinga molkun kin, oł embin tui endi tonu omba ei, nim dinga molkun kin, Jiisas Kraias nge opu ond wu mendpił mulnjii.

<sup>4</sup> Opu ond wu endi, opu palikim kunum ei, pupu kin, kongun eipi kanim kanim endi enałim, mon! Opu dinga kind erpi, yi er mułang kin, opu ond wumb tep elim wu ei, kanpi ka piikim.

<sup>5</sup> Wu epi simin nik kin, sikirik punmun ei, lo pałim mił ei, ekii sinarik punmun wu ei, epi endi sinermba mon.

<sup>6</sup> Wumb nii endi eim kongun dinga kind er pułum, wu min amb ei, eim kuni tonu wang kin, eim kuni ei, eim kumb se numba.

<sup>7</sup> Na nind ek ei, nim kom se piinjii! Owundu nim noman er kun erang kin, nim ombu pułe pei pii poru ninjii.

<sup>8</sup> Kunum kunum nim molkun kin, piinjii ei, Jiisas kołpu kin, nga tonu opu konj pum ei, piinjii. Eim Deipis nge tilap ende mołpu kin, ek yi mił, na Gos ek ka nip tor kindip eł, ei nim piin.

<sup>9</sup> Na Gos nge ek ka ei, minj nip eramb kin, wumb na wu kis nik kin, na oġ embin tui kanim kanim ngoġmun. Keimi, na sip kan ngii eġ kindiġmin; ba Gos ek ka ei, kan kapġi pinermba mon. Ba pu nip konu eġe orung orung eipi eipi ba.

<sup>10</sup> Ei nam yi piip kin, noman eġe dinga kindip kin, oġ embin tui ei piip ko wup eġ. Eġ ei, erip kin, Gos eim nge wumb tiġap ei, paki toġ. Nam yi eramb kin, wumb Krai Jiišas kin noman konj kunum kunum sik kin, kunum kunum eim kin ouni noman dinga tiġang ei sik kin, ka muġngii nip kin, oġ yi miġ end.

<sup>11</sup> Sinim ek ei pii gii mendpiġ ninjpin kin, ei keimi ni piimin,

“Sinim Jiišas eim kin koġpun kin, sinim eim kin ouni noman konj kunum kunum sipin kin, ouni tep to muġmun.

<sup>12</sup> Sinim eim kin piipin kin, oġ embin tui tonu omba kunum ei, sinim dinga kind moġpun kin, eim king muġmba konu eġe, sin eim kin ouni king miġ tep to moġmun ku. Pe sinim eim buġ ngunjpun kin, kapġi eim yi ku, sinim buġ ngumba.

<sup>13</sup> Pe sinim Gos eim ek ei piimin nimin; ba ek ei ekii sinarpin enjpin. Ba Krai Jiišas eim mendpiġ ek ei, eim keimi piipi moġum. Krai Jiišas eim ek endi nipi keimi mendpiġ muġmba. Nimbiġ erang ei eim ek kend ei, kapġi tunermba mon.”

### *Kongun Wu Mendpiġ Ei Gos Kin Embe Koġum*

<sup>14</sup> Kunum kunum nim wumb noman pirek nimba piingii ek ei ninjii. Gos nge ningiġ eġe, ek dinga nikin kin, wumb ek miġ erik kin, ek kanim

kanim nik erngii ei, mon nikin. Nikin kin, ol ei nge, wumb endi paki tunermba mon. Wumb to kis minj elmin. Wumb ek ei nge piilmin wumb ei yi elmin.

<sup>15</sup> Nim kongun dinga kind erkin kin, nim kongun wu mendpil mulan kin, Gos nim kin ka piip ngumba. Ngopu kin, nim Gos ek ei, kun ni wumb ngan piingii ei, nim Gos kin singambit peng piinenjii.

<sup>16</sup> Ek eipi eipi nik kin, ek wii mit nik erngii ei, enim mandi puk piinerngii mon. Ek ei ek pule pinalim ek ei nge, wumb nik si pangin kin, Gos ek bul ngok, ek ei piik kin, andlam kis punmun ei nge, enim punerngii mon!

<sup>17</sup> Wumb ek ei, sinim ngenj kinj kis nopu owundu pulum ei mit, Aimeniyas kin Pailesis wumb ei nge, tilap ele ek yi palilim.

<sup>18</sup> Wu ombu nge ek keimi ei, pii dembin tunarik kin, wu ombu ek yi mit nilmin kin, sinim kolpun. Nga konj molmun poru ninmin; nga ekii se endi enermin mon. Enarpin kin, ek ele nge nik kin, wumb kombur nge pii gii ei, er kis mondukmun ku.

<sup>19</sup> Ba Gos eim ngii tumunj dinga endi, pol engindrim dinga wii angilim. Pe ond pos ele Gos ek mon endi, yi nip molum. Gos eim nge wu amb ei, piipi kanpi poru nipi molum. Pe nga mon endi palim ku. Wumb pei, Gos embe sikmin wumb ei, ol kis si kindik kin, bul ngok, ka mulngii.

<sup>20</sup> Pe ngii owundu endi angilim konu ele, nirikring ming ombu kanim eipi eipi pei salim. Pe ming kopur, ku silpa ni, gol ni, yi elmin. Nga ming kopur ond ni, mei nganmbi ni yi elmin.

Ełmin ming ombu nge kopur, kongun ka palim mił ełmin; nga ming kopur eipi kongun wii pei ełmin.

<sup>21</sup> Ei yi mił, wumb nii endi eim oł kis ełmin oł ei, Gos eim pei kil ngo si kindang kin, kun ka mułmba wumb ei, eim kongun mendpił, ka endi pałim mił, kongun ei ermba. Wumb ei, eim ming ku silpa min, ku gol ka mił, yi mołum. Nimbił erang wumb ei, eim ngenj ni, noman tuk pei, Gos kil ngo si kindang kin, eim kongun ermba nge, er kun erpi mołum.

<sup>22</sup> Wu kangi wu noman ełe kis tonu wang kin ek kis nik erngii wumb ei kin, nim punenjii. Punarkin kin, nim oł kun ka ei erkin, pii gii peng kin, noman emin ka peng kin, wumb noman ka ngan kin; wumb noman emin ka peng kin; Gos owundu kin prei erkin, kii se gokun kin mulnjii.

<sup>23</sup> Wumb wulu pang kin, ek eipi eipi nik kin, erngii ei piinenjii. Piinarkin kin wumb noman ka pinerang kin ek ei nge, nik opu minj ełmin.

<sup>24</sup> Gos nge kongun wu ek opu enermba mon. Eim wumb kin oł ka ermba. Eim wumb ek emb ka to ngołum kunum kunum kui er mołpu kin, kongun ka ermba. Erang kin, wumb eim oł kis erngii min, oł embin ko wupu kongun minj erpi kin, Gos ek nipi kin, wumb ngopu minj mułmba.

<sup>25</sup> Wumb eim ek to kindik erngii ei, ek taki taki nipi erang kin, Gos eim wumb ei, paki topu erang kin, noman ak to ok kin, ek keimi ei piingii.

<sup>26</sup> Ok Seisen eim, wumb ei omu kon mił połpu kin, tuk sirim. Seng kin, eim ek ei piik kin, ekii singii; ba nga ekii se, Gos ek keimi ei piik kin, noman ak tok kin, Seisen si kindngii.

### 3

#### *Kunum Poru Nimba Mandi Erang Oł Kis Tonu Omba*

<sup>1</sup> Ba nim oł yi mił piinjii, kunum poru nimba kunum ei, oł embin tui kanim kanim tonu omba.

<sup>2</sup> Pe wumb en enim mendpił piingii. Piik kin, ku nin epi noman kulk kin; nga en enim embe ambił tonu kindik kin, oł kis erik kin; nga Gos kin wumb eipi ek kis nik kin, yi nge nik ngomun. En enim ernjing menjing ek niłmin ei piinarik kin, nga en enim ek ka ni ngunałmin; nga en enim oł kun ka pałim mił ei, ekii sinarik kin, buł ngok enmin.

<sup>3</sup> Pe wumb en enim miyem ende noman ka ngonarik kin; nga ek kis ei si kindnarik kin; nga en enim wumb eipi kin ek buł ambilk kin; nga en enim nge ngenj ełe noman tep ka enarik kin; nga wumb wulu pang kin, kung simbii mił andik molk noman pinałim, mił erik kin; nga en enim oł kun ka ei kin opu orung ku ełmin.

<sup>4</sup> Nga en enim nge wumb puł sik kin, opu erii wumb ngok kin; nga en enim oł kis ei sikir ekii sik erik kin; nga sin sinim wu num ni piik yi erik kin; nga en enim ngenj ełe oł ei ka ka piik erik kin; nga en enim Gos kin noman ngunałmin mon.

<sup>5</sup> En enim ngenj ełe ambił tonu kindik kin Gos nge oł ei mił ni piik erik; ba Gos nge noman Gos nge tiłap ełe wumb mił dinga ei en enim buł ngok ełmin. Erik kin nim wumb ei yi erngii wumb ei kin nim tep to andkin punenjii mon!

<sup>6</sup> Wu kombur en enim andik, noman eipi eipi sek kin, yi ełmin. Erik kin en enim amb ombu noman kis kanim kanim pałim amb ombu kin,



kanik kin, amb ombu ngii konu ele, en enim nirik puk kin, en enim noman embin palim ei, en enim noman ele epi ol kis mil to eipi eipi kindik kin ambil gii nik yi elmin.

<sup>7</sup> Erik kin, amb ombu nge, kunum kunum ek keimi ei ni, kan simin ni elmin; ba kapli enalim.

<sup>8</sup> Ok wu Janis kin Jambris wu tal, Moses tep erim ol ei, to mani kindmbil ni piiki kin, jep ol kanim kanim kun pinaim ol ei elmbil. Elmbil ol yi nge, pe wumb ek keimi ei, to mani kindik yi ermin ku. En enim noman kun pinaim, yi erangin kin, pii gii pinerang kin andinmin. Ba wumb en enim pii gii ei, kapli pimba mil pinaim mon.

<sup>9</sup> Ba wumb enmin ol ei, opu owundu punaaim mon! Pe wumb keningii ei, ol wulu pui mil endi ok, wu Janis kin Jambris tel erki ol jii enmin ni keningil.

<sup>10</sup> Ba nim na kin kunum kunum andkin kin, ei na ek nip kin, wumb andan top enj. Nga andlam andip el mil ei, nim piilin; nga na el ol ei, pule nim piilin ku. Nim na piin kin, na Gos kin pii gii dinga nil. Na wumb eipi kin noman ngop kin, kunum kunum nam dinga kind molup kin, Gos nge kongun el, end ku.

<sup>11</sup> Nim piin ei, wumb na kin ol embin tui ngołmun ei, nim piin. Piikin kin, nga ngenj kumbii konu ele orung Andiok ni, Aikonyam ni, Lisra konu ele ombu pei piil. Nim piin ei, wumb na kin ngenj kumbii ol kanim kanim elmin; ba Gos Owundu eim nga ele si tor sim.

<sup>12</sup> Keimi wumb pei Krai Jisas kin dambiltik se ende puk, Gos nge ol ni, ek ka ei, ekii simin ni erngii wumb ei, opu orung wumb tangin kin,

ngenj kumbii yi singii.

<sup>13</sup> Wumb kis ni, ek kend wumb ei, wumb ek kend to ngołmun. Ngangin kin, nga Seisen nge ek kend tang owundu pulum ku. Wumb en enim oł kis owundu mendpił ełmin. Nga wumb eipi en enim kin, ek kend tok ngołmun ku.

<sup>14</sup> Nimbił erang wumb ei, nim ek ei nik ngunjung ei, pii kun er mulnjii! Mułan kin, nim pii gii nikin ek ei, na nim emb top, nip ngur ek ei, dinga ambił gii ninjii.

<sup>15</sup> Pe nim ei piinjii ku, ok nim kangil kembis kin molkun kin, nim Gos ek ka ei nim piilin. Piikin kin Gos ek ka ei, nim noman ngang kin nga pii gii nikin mułan kin, Gos ni Krai Jiiisas nim sipi orung simba.

<sup>16</sup> Gos nge mon ek ka ei, Gos kin mendpił om. Opu kin, Gos mon ek ka poł pendpi ek ei, Gos ek keimi mendpił palim. Peng ek ei, sinim kin pii si kindpin kin, Gui Ka andan topu ngonum ek ei piipin kin, Gos oł kun ka ekii se bin.

<sup>17</sup> Gos ek ka ei, sinim Gos nge wumb erpi, kun ka erang kin, sinim Gos kongun ka wii ei, ermin nge, er kun erpin mułmun.

## 4

### *Nim Gos Ek Nikin Wumb Ngunjii*

<sup>1</sup> Krai Jiiisas eim, wumb kulii konj pei, mok tumba. Topu kin, eim Gos ningil ełe ni, Krai Jiiisas nge ningil ełe, na ek nip kin, nim dinga ngond. Ngop kin, Jiiisas ekii se orung omba ei, opu kin, wu king kunum kunum tep mułmba ei, na ek dinga nip nim ngond.

<sup>2</sup> Nim Gos ek ka ei piikin ek ei, ni wumb ngunjii ku. Ngokun kin wumb ek ei piimin min piinermin nik er muŋgii; ba nim Kraiŋ Jiiŋas ek ka ei, kunum kunum ek dinga ningii! Nikin kin, wumb en enim oŋ kis eŋmin oŋ ei ni piik kin, Gos oŋ kun ka ei ekii sinarik eŋmin. Erik kin, ei nim nen kin, Gos oŋ kun ka paŋim miŋ, ei ekii singii. Sik kin, kunum kunum nim kongun erkin kin, kui er muŋun kin, wumb kin ek ka ni ngokun kin, paki dinga tokun enjii. Yi eran kin, wumb ei, noman to ak tok kin, oŋ kis si kindik kin, Gos oŋ kun ka pimba miŋ erngii.

<sup>3</sup> Piini! Ekii se wumb ek keimi ei piinerngii mon. Ba wumb en enim noman eŋe piik kin, ek emb toŋmun wumb pei, sik erngii. Erik kin, wu ombu ek eipi ningii ei, kom se piik kin ekii singii.

<sup>4</sup> Wumb ei Gos nge ek keimi mendpiŋ, ei si kindik piinarik kin, ek poŋ wii ni, siimaŋ eimaŋ ombu nge, kom sek piik erngii.

<sup>5</sup> Ba ninim kunum kunum kun ka piinjii! Piik kin, oŋ embin tui tonu omba; ba nim embin ei ko wukun kin, Gos ek ka ei nikin kin, wumb ngunjii. Nga wumb paki tan kin Gos nge kongun wu miŋ endi kongun kun ka enjii.

<sup>6</sup> Nim piin ei, pe nam noman konj ei, enim kin ngop si kindip pendip kin, nam ya mani mei eŋe wakin top si kindip bii kunum ei, mandi enim. Ei yi erip kin, nam kuŋmaŋ miŋ kaŋip kin, nam nge miyem ei, enim kin bein top ngop pendip kin bii.

<sup>7</sup> Na nam kongun dinga kindip erip, sikirip pup kin, tor punj ei yi miŋ; Gos nam ngum kongun ei, dinga kindip, er poru ninj. Na pii gii ei wakin top kindnenj mon.

<sup>8</sup> Na pe na simbii epi ei er kun er salim. Sałim epi ei, yi mił ninim, pe Gos Owundu ningił ełe, na wu kun ka nimba. Akip kunum ei, Owundu nam mendpił epi ka wii ei na ngunermba mon; ba wumb eim tor wang kin, kenmin ni, kui er mułngii wumb ei, yi ku singii.

<sup>9</sup> Nim na kin ombii nikin kin, er ka erkin kin, na kin sikirkin onjii.

<sup>10</sup> Piikin kin mułii! Wu Diimas eim na wakin topu kin, eim mei ełe oł ei, noman peng kin, na si kindpi kin Tesalonaika konu ełe pum. Nga wu Kresenj eim Galeisiya konu ełe pum. Nga wu Taisas eim Dalmeisiya konu ełe pum.

<sup>11</sup> Wu Luk mendpił eim na kin mołum. Nim wu Mak nen kin, ouni weł! Wu Mak eim kongun ka elim ei, na kongun paki tumba.

<sup>12</sup> Na wu Tikikas eim Epeses konu ełe pui nip, kindamb kin pum.

<sup>13</sup> Nim onjii en kin, na konduk muł elim kon takis ei ni, wuł Trowas konu ełe, wu Kapas ngii konu ełe salim ei, sikin mon ni, mon kombur, ka genj sik elmin ei, sikin tui ku.

<sup>14</sup> Elikesander wu ei, eim kapa epi elim wu ei, na kin oł embin tui ngopu erim. Ekii se Owundu eim enim oł ei mił, eim kin kumep kis orung yi erang kin, piimba ku.

<sup>15</sup> Nim yi ku, wu ombu konu ełe, kan kun er mulnjii. Mulnjii wu ei, sin ek pei to mani kindmba erim.

<sup>16</sup> Kumna ei, na kos ek nip, orung kindinj kunum ełe, wu endi na kin tep to ngop ninj. Ninj kin, oł kis mił enmin ei, “Nim piinerii, mon!” ninj.

17 Ba Gos Owundu na kin tep er mułum. Mołpu erang kin, na Gos ek ka nip, wumb torung mulnjung wumb ei, ni ngunj. Kung simbii wumb nołum konu ełe pamb kin, Gos kulii konu ełe si tor sim.

18 Wumb na kin oł kis ermin ni enjing; ba Gos Owundu eim na kin oł kis kanim kanim na kin tonu omba ei si tor sipi kin, nga Gos eim sinim tep er mołum konu ełe, eim na sipi kin orung simba. Gos kin tilang owundu nin, embe owundu ei nin, kunum kunum mułmba; ei keimi!

### *Ek Poru Ninim*

19 Nim Pisila kin Akwila tał kin, wu Onesiporas nge kingam ambilam noł ni, wumb ombu kankin yi ninjii. Na enim wumb ei kin, 'Noman ka piip ngond,' yi mił niyo!

20 Erasmus eim Korin konu ełe enj mołum. Nga Tropiimas eim ening peng kin, na eim Mailisas konu ełe mond si kindip onj.

21 Nim erkin kin, sikir onjii. Yi er mułan kin, pop topu, jii nip ełim kunum ei tor omba. Yupulus ni, Purenj ni Lainas ni Kloriga ni wu ombu, ni wu angim angim pei nim kin noman ka ngonum ei, 'Nim ka muliyo!' ninmin.

22 Gos Owundu nim nge noman tuk gui ełe ouni mułmba. Gos eim nge noman ka ngopu enim oł ei, enim kin mułmba.

**Gos Nge Ek Ka Ei Sinim Kin Ngołum**  
**The New Testament in the Nii Language of Papua New**  
**Guinea**

**Nupela Testamen long tok ples Nii long Niugini**

copyright © 1980 Wycliffe Bible Translators, Inc.

Language: Nii

Dialect: Central Wahgi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

---

PDF generated using Haiola and XeLaTeX on 18 Apr 2025 from source files dated 31 Aug 2023

57529bce-9e23-5350-904d-243a1b359818